

Ч. 11. (95.)

Крыница, четверг дня 19. марта (6.) 1936.

Рок III.



Орган Лемковского Союза.

Пренумерата в краю:  
30 грошей місячно,  
80 „ квартално  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

Ціны оголошень:  
Ціла сторона 120 зл., 1/2 сто-  
роны 60 зл., 1/4 стороны 35 зл.,  
1/8 стор. 20 зл., 1/16 стор. 10 зл.;  
оголошення малы за 1 мм. 20 гр.,  
в тексті 30 гр., перед текстом  
40 гр. При місячном и долгом  
оголошеню значна знижка.

Контото чекове Нр. 404.155.

Выходит в каждый четверг.

Редакция и администрация в Крынице. — Адрес „Лемко“ Крыница.

Всіх читателєй, котры не вплатали ище пренумераты, просиме выровнати якнайскорше рахункы.

Ище єст на складі **Календар „Лемка“ на 1936-ый рок.**

Ціна одного календара выносит 50 гр. При замовленях 10 календарей оплату почтову платит редакция.

## ПО СМЕРТИ АПОСТОЛЬСКОГО АДМИНИСТРАТОРА.



Як уж в незвычайном выданю „Лемка“ с дня 12-го марта мы донесли, в ночи с среды на четверг умер наш Владыка о. др. Василий Масцюх, Апостольский Администратор для Лемковщины.

Покойный не западал на здравю через ціле своє житє и аж перед 2-ма недїлями чул ся недобре и положил ся до постели. Завоззаныи до бл. п. Апостольского Администратора лікар, Д-р Гукевич с Устрик, сконстатовал у него недуг грудей и сердца и приказал пролежати в постели 3 недїли и перестеригати диету. По килькох днях однак бл. п. Апостольский Администратор чул ся уж добре, встал с постели и уладжал текучи діла. В среду (11.III.) чул ся бл. п. Ап. Администратор совсем добре, трудил ся цілый день и вечером, не передчуваючи нич злого, удал ся до своєй спальні.

В четверг рано здивовало всіх тото, же бл. п. Ап. Администратор не выходит со спальні. Задуркано до дверей, а коли никто не отзывал ся, открыто ключом двери и найдено Владыку лежачого в постели без озчак житя. Прикликаныи лікар ствердил смерть.

Тихо и спокойно заснул у Бозі пок. Владыка. Смерть Его перешла спокойно, бо и спокойно и тихе было ціле Его житє. Пок. Владыка от ранной молодости трудил ся серьезно, але о трудах его говорили мало, бо покойный не любил розголоса. Яко священник, выполнял ревно приняты на себе обовязкы, а кромі того посвячал много сил и часу научным трудам, котры довели его до высокого и отвѣтственного сана, Апостольского Администратора для Лемковщины.

На том высоком и почетном постерунку не перестает он в своих трудах, сам старат ся познакомити со всіма квестиями повіреной Ему паствы, об'їзджат часто всі закутины лемковской землі и сам лично уладжат

всі текучи діла, виготовляючи рефераты и пастырскы жосланы и отвічаючи на всі писма. Тож жите Его переходит в труді, тихо и незамітно, але неменьше начата Ним работа и Его діла сділают Его голосным и славным. Помер Владыка, але засіяне через Него зерно братской згоды и християнскої любви буде жити и розвивати ся дальше и принесе напевно нашому народови счастье и лучшу долю, а самого бл. п. Владыку задержит в доброй и вдячній памяти!

До часу обсадження владычого престола всі функции Апостольского Администратора буде сполняти О. Декан Владимир Мохнацкий, парох с Тылича яко найстарший віком консулятор Апостольской Администрации.

## Што буде с нашом молодежом.

В послідных двох роках оживил ся на Лемковщині рух посылання до школ нашой молодежи. Хоц тяжкы часы, хоц не оден не має чим оплатити податкы и другы звязаны с хозяйством выдаткы, хоц біда тисне и вдерат ся до хат дверми и окнами, люды пхают свои діти до школы, здаючи собі справу с того, же народ без трудовой интеллигенции не єст народом и не може належито розвивати ся, ани заняти належного положеня серед других культурных народов.

До оживленя того руху причинила ся в значной мірі Руска Бурса в Горлицах, котра завдякы жертвенности нашого народа, має можливість приймати и удержати воспитанников по барз низкой ціні, а найбіднійших аж и совсем безплатно.

Здавало бы ся в виду того, што все єст в порядку, бо маме бурсу, в котрой молодеж находит помещенє и люды охотно отдают свои діти до школы. Тымчасом так не єст, бо єст одна велика перешкода, котру мусиме старати ся усунути, если хочеме дождати ся підкріпленя рядов нашой интеллигенции. Том перешкодом єст брак школ в Горлицах. Што-ж нам с того, же бурса приймат и може ище больше учеников прийняти, если не примут их до гимназии, або до других школ. Горлицка гимназия має обмежене число учеников и понад то число дыректор гимназии не може никого прийняти. Повтарят ся в виду того каждого року тот сама история. До экзамену вступного приймат ся около 200

учеников, а до першой клясы приймат ся с того 80 хлопцов, а решта, (120) хоц и здала экзамен, мусит ити до дому, бо ніт для ней місца в школі. В высших клясах єст так само, а все промовят за тым, же буде штораз планьше. Наши люды не могут гдеинде посылати свои діти до школы, бо там знова ніт бурсы, а их не стати платити дорого за науку и удержанє. Тому ніт другой рады, лем треба доконче старати ся о того, штобы в гимназии в Горлицах нашло ся місце для нашой учачой ся молодежи. Стараня належит начати уж тепер, штобы перед вакациями могла быти тот пекуча справа рішена. Стараня мусят выйти от людей. Люды сами мусят зберати подписы на поданях до Министерства Віроисповіданя и Просв. и просити о утворенє паралельных отділов при всіх клясах горлицкой гимназии для лемковской молодежи. Поданя такы с печатками громадских и сельских урядов высыланы масово до Министерства через Лемко-Союз в Горлицах дадут добрый результат и отворят нашой учачой ся молодежи ворота до школьных заведень. Мусят они быти зроблены скоро, бо час уж недалекий. В той ціли належит скликати загальны собраня читалень им. М. Качковского и на них приймати отвітны рішеня. Не занедбуйме той справы, бо она для нас барз важна, але в якнайкоршом часі составляйме поданя и зберайме подписы.

## Уряды и населенє.

Не потреба незвычайно спостерегательного обсерватора, штобы звернули увагу на характерыстычне явленє в наших отношениях. От часу до часу якаси справа, якаси квестия входит на терен публичной дискуссии и с незрозумілых нераз причин розрастат ся и увеличезнят до карыкатуральных розміров. Так єст в послідных часах с „квестиом бездушного бюрократизма“, котрый, як бы тяжкий гріх, має обтяжити нашу державну администрацию. Много в той справі записано паперу, много горычи розляно с розличных трыбун, а тымчасом квестия тот представлят ся совсем иначе и то без взгляда на то, ци береме ю с точки практыкы штоденного житя, ци тыж с точки отношень до той квестии рішающих чинников.

Серед тяжкого наслідства, який одержала Польша по окупантах, оден с найприкрий-

ших позицій был бюрократизм. Пригадайме собі также, як то поволи отношеня тоты зміняли ся на лучши, хоц мусит ся признати, же вплив бюрократии окупантской затяжил сильно на бюрократии молодой. Тому станови річи послідны правительства выдали рішительну борбу. Выдали они борбу также переростам нового свойственного бюрократизма, а кто дальше удержує, же акция гота не выдає постепенно добрых результатов, тот посвячат правду в заилости узагальняня поодынокых преступлень або недостатков в дійствованю администрацийного апарата.

Отвітственны за належите функционованє администрацийного апарата чинники видят сами тоты недостатки, звертают на них публичну увагу и старают ся дальше выруговати злы навыкы и направити отношеня администрации до населеня. Идучи по том пути, подыктованом старанєм о публичне добро, министр внутренних діл выдал обіжник, на котрый належит звернути увагу. В обіжнику том містит ся передовсем рішительне порученє, штобы в отнесеню до населеня всі власти приміняли всякы возможны льготы, уникаючи всего, што могло бы быти отчуте, яко утяжливое и неосноване публичным добром, всего, што свідчило бы о недостаточном численю ся урядника с трудностями, які має населенє. Обіжник поручат также, штобы уряды, приміняючи законы и приписы, руководили ся властивым духом и сенсом в них ся містячим, а не формальном стороном. Рішеня администрацийных властей мусят отличати ся доброжелательным отношенєм до потреб населеня и добре зрозумілым публичным добром.

Уж с тых загальных а так основных поручень выникат, в яком напрямі иде розвите нашой молодой администрации, до котрой приходит штораз больше молодых сил, не зараженных снідьом бюрократии.

Розвиваючи тоты основны засады Министер пояснят пак подробно, як уряды мают уладжати потреби зголошующого ся до них населеня. Поясненя тоты оживят стало мысль и порученє щадити час и материяльны средства населеня и руководити ся публичным добром. Велику и особенну увагу звернул Министер на вырозумілость урядов першой инстанции, бо там має до уладженя свои діла сельске населенє, котре с натуры річи не уміє собі радити с евенчуальностями занадто рыгорыстычного и формалистычного трактованя его потреб.

## Мысли о прошлом и теперешном.

(Продолженє)

Конец войны не был такой как ждали его галицкы украинцы. Галицкым украинским епископам уж во сні снило ся, начинаючи от усуненя цара, што они засідают на кыевских, харковских, черниговских епископских престолах, а гдеяким снил ся и украинский патриархат. Галицкым украинским политычным махерам, котры розлакомили ся на министерских и секретарских достоинствах в Станиславові, котры вагонами крали борыславску нафту и парафину и вывозили ю за границу, снило ся уж, што они гетманами и министрами в Кыєві, што прогнали всіх „москалів“ из Украины а из каждого раньше здерли, што лем мал при собі, а наконец и скору. Президент украинских министров „Западной области Украинской Народной Республики“ Д-р Голубович так ся розбрыкал што пак достал пару місяцов криминала, и то не за политычный злочин, а прямо за обман ци шантаж.

А тымчасом всі тоты заманчивы, солодкы сны кончили ся сумно. Простор власти и влияний для галицкых „козарлюг“ в жупанах, фраках и реверендах не лем не поширил ся до Чорного

моря, но и ту на „галицкой Украині“ утратили власть, отриману от Австрии на річ польской державы.

Кандыдаты на гетманов и министров мусіли сховати хвосты под себе, а зато вся злоба украинского шовинизма проявила ся в области жизни церковной.

Ту не было кому належито противопоставити ся волні украинского шовинизма. Священников русских мало, а тоты, котры по Талергофах и Терезынах остави в живых, зломаны на си: ах морально и физично под угрозом суспензии, мусіли молчати. Конкордат заключеный медже Польщом и Римом признал за епископатом полну власть распорядимости церковным и парохияльным маєтком за цілковитым выключенєм власти державной (чого не было за Австрией) а низше духовенство подчинил необмеженной власти епископа.

Рускы политычны и общественны организации восточной Галичины проспали отвітну хвилю и заміст взяти ся до рішительной борбы с украинизациом церкви так, як то зробила Лемковщина, бавили ся в „велику политыку“ и в компромисы с украинцами.

(Продолженє в слід. числі).

На тоту сторону поручень Міністра хотіли мы звернути увагу широких кругов наших читателів.



Начальство Округа Корпуса Нр. V.  
в Кракові.  
Нр. 271|Кдр. 36.

## ОБЯВЛЕНЕ

о покликаню на законны войсковы вправы офицеров резервы и прапорщиков резервы в року бюджетном 1936/37.

Зарядженем с дня 8.ІІ. 1936 р. выданы на основі арт. 79. закона о загальном обовязку войсковом (Дн. З. Р. П. Нр. 60/33. поз. 455) покликую П. Министер Военных Діл в року бюджетном 1936/37 на звычайны вправы войсковы — на цілом пространстві Річипосполитой — офицеров резервы и прапорщиков резервы вычисленых понизше оружий и служб:

### Піхота.

офиц. рез.: рочник 1902, промоций: 1931 (рочн. 1903—1906), 1933, 1935; с промоций 1932 — тых, котры не отбыли двох вправ, с промоции 1934 — тых, котрым отложено вправы до р. 1936/37.

прап. рез.: а) котры не отбыли дотепер жадной вправы,  
б) котры по перших вправах не одержали условий до номинации на ппор. рез.

### Кавалерия.

офиц. рез.: промоций: 1931 рочн. (1903—1906), 1933, 1935;  
с промоций: 1932 и 1934 тых, што были обняты покликанем на вправы в року бюджетном 1935/36 и вправ тых с рижных причин не отслужили.

прап. рез.: як в піхоті, понадто тых, што в р. 1935 окончили обовязкову службу чинну и были перенесены до резервы.

### Артылерия.

офиц. рез.: промоций 1932 и 1935;  
с промоций: 1931 (рочн. 1903—1906) и 1934 тых, котры были обняты покликанем на вправы в року бюджетном 1935/36, а вправ тых с рижных причин не отбыли.

прап. рез.: як в кавалерии.

### Аеронавтыка.

офиц. рез.: промоций 1933, 1934, 1935.  
с промоции 1932 тых, што были обняты покликанем на вправы в року бюджетном 1935/36 и вправ тых с рижных причин не отбыли;

прап. рез.: як в кавалерии.

### Оружие панцырне и самоходы, саперы, звязь.

офиц. рез.: промоций: 1931 (рочн. 1903—1906), 1933 и 1935, а также тых, што мали отбыти вправы в р. будж. 1935/36 и вправ тых не отбыли.

прап. рез.: як в піхоті.

### Жандармерия.

офиц. рез.: промоций: 1931 (рочн. 1903—1906) и 1933, а также тых, што мали отбыти вправы в р. будж. 1935/36 и вправ тых не отбыли.

### Таборы.

офиц. рез.: рочн. 1898—1902, промоций: 1931 (рочн. 1903—1906 и 1933).

### Служба вооруженя.

офиц. рез.: рочн. 1897—1901 промоций: 1931 (рочн. 1903—1906), 1932 и 1933.

### Служба интендентуры.

офиц. рез.: рочн. 1896—1907, промоции 1933.

### Служба здравя.

офиц. рез.: лікарей мед. рочн. 1895—1902 и промоций: 1933 1935.

аптекарей промоций 1935, санитарных промоций: 1933 и 1935. понадто всіх, што мали отбыти вправы в року будж. 1935/36 и вправ тых не отбыли.

прап. рез.: лікарей мед. незаквалифицированных до номинаций на ппор. рез., дентыстов, аптекарей и санитарных, што: а) не отбыли дотепер жадных вправ, б) по отбытию перших вправ не были завалифицированы до номинации на ппор. рез.

### Служба ветеринарийна.

офиц. рез.: промоций: 1933 и 1935, а также тых, котры подпадали покликаню на вправы в року будж. 1935/36 и вправ тых не отбыли.

### Служба географична.

офиц. рез.: рочн. 1899 и 1900, промоций 1931 (рочн. 1903—1906), 1932 и 1933.

### Марынарна военна.

офиц. рез.: тых, котрых покликаю на вправы войсковы в р. будж. 1935/36 и вправ тых не отбыли а также тых, котрых покличе нарочно Шеф Начальства Военной Марынаркы.

прап. рез.: як в піхоті.

Час треваня вправ для вычисленых высше категорий выносит:

для офицеров резервы—3, 4, 5 або 6 неділь,  
„ прапор. „ — 6 неділь.

Загалны постановленя, относячи ся до людей подпадающих покликаню на войсковы вправы:

1) Офицеры рез. и прап. рез. подпадаючи покликаню в р. 1936/37. достанут именны „карты покликаня“ с означенем формации, термина явленя ся и часу треваня турнуса, на котрый их покликано.

2) Справу отложения або пересуненя термина вправ регулиют §§ 379 до 381 исполнительного зарядженя до закона о загальном обовязку военном (Дн. З. Р. П. Нр. 83/34 поз. 707).

3) Трыб поступаня державных и самоуправных властей при выступаню с внесенями с уряду регулию § 383. вык. зарядженя до зак. о загальном обовязку военном.

4) Просьбы отвітно мотывованы и удокументированы мают заинтересованы высылати просто до начальников своих формаций евиденцийных найпозднійше на 4 тыждні перед термином явленя вызначеным в карті покликаня.

5) Просьбы складаны в терміні опоздненым, або в способ неотвечающий постановлениям вык. зарядженя до закона, не будут рассмотряны безусловно.

6) Если покликанный на вправы на внесену просьбу о отложеня або пересуненя термину не одержит отвіта перед термином явленя ся, мае зголосити ся в отділі в терміні вызначеном на карті покликаня.

7) Тоты, котры не выполнят обовязка зголошеня ся на вправы, подпадают карам, предвидженым в уст. XVI. „постановленя карны“ закона о загальном обовязку военном.

Краков, дня 1. марта 1936.

Начальник Округа Корпуса Нр. V.

(—) Нарбут-Лучинский  
генерал бригады.



## НІМЕЧЧИНА ЗАНЯЛА ПРИРЕНСКУ ОБЛАСТЬ

Канцлер Гитлер на нарочно скликаном засіданю Рейхстага выголосил бесіду, в котрой приказал заняти своим войскам здемилитаризованный Приренский край. В бесіді той выступил Гитлер остро против Совітам. Он упомянул о своих усилиях и старанях в ціли навязаня порозумленя с Франциом и заявил, же не его в том вина, же не дошло до порозумленя. Дальше Гитлер заявил, же пакт Франции с Совітами ест зверненный специально против Нимеччині и прото нимечке правительство мусіло предприняти отвітны крокы, як выповіджене локаренского трактата. В дальшой бесіді Гитлер заявил, што он годит ся заключити со всіма сусідныма державами подобны договоры, який заключил с Польщом. Што до Литвы, то такой договор был бы также возможный, если Литва згодит ся на цілковиту автонимию территорияльну Клайпеды. Гитлер наконец предложил заключеня пактов со всіма западными державами на 25 літ. Он оголосил также розвязаня Рейхстага и новы выборы на 29 марта.



## Плекайме ярины и сады.

Грунту мают люды штораза меньше, прото мусят старати ся, штобы с него вытягнути як найбільше користи. Зерно и полева ярина, як буракы, картофлі и капуста мают днеска так низку ціну, же аж и при добрых вродах плеканя тых землеплодов приносит малый хосен. Иначе мае ся однак справа с городовыма яринами и озочами. Помидоры, салата, каляфиоры и друга городова зеленина мают тепер в містах и купелевых заведенях покуп и их плеканя може принести нашому населеню значны доходы. Але управа тых рослин потребуе науки и тому уряджат ся в Крыниці-Селі

### курс огородничо-садовничий,

на котром фаховый професор природник и садовник буде учити, як треба поступати, штобы одержати красну зеленину и овочи. Штобы науку оперти о практыку, выареновано 1½ морговый огород, где сут инспекты и дерева овочевы так, же курсанты в годинах дополудневых будут заняты практычно, а по полудни будут выклады теорытычны. Буде учити ся щепити деревка, провадити садок деревец, а также плекати всі ярины, маючи покуп в місті. Курс начне ся 22 марта, або позднійше, если бы в том часі был ище сніг, в каждом разі втотчас, коли буде можна робити в огороді. Условия принятя на курс сут помещены в оголошеню на ст. 4-ой Лемка.

Не занедбуйте случая и вписуйте ся численно на курс!

## Што чути в світі.

До Женеви прислала Абисинія відповідь, в котром заявлять свою згоду на початок мирних переговорів. Але негус застерігає, же переговори мають бути ведені в духу пакту і в рамках Лиги Народів.

В Англії будують тепер величезний гідроплан, котрий буде найвеличшим повітряним кораблем світа, переізначеним до транспорту пасажерів і пошти через Атлантичний Океан. Новий великан помістит в собі 100 пасажерів.

Москва: Японський посол Ота заявив комісару заграничних діл Литвинову, же недавні події в Токио не змінять відношень в політиці японського правительства з Світами.

Москва: Світське правительство приступило до робіт, стремачих до перекопаня каналу, котрий получит Чорне Море з Морем Каспійським. Новий канал наводнит также пустинні просторства, находячи ся межде тьма двома морями.

Мадрид. Безпорядки в Іспанії панують дальше. Дня 8. марта комуністи в часі демонстрації спалили пару костелів і каплиц і напали на доми і бюро членів правих партій.

Москва: Світське правительство приступило до організованя козацьких полків. В днях 11 і 14. марта випали со своїх станиц в Ростові над Доном козацькі сотні донських, кубанських і туркестанських козаків в повній довоєнній царській формі т. є. в шараварах з лямпасами.

Париж: Конференція чотирох держав, котрі разом з Німеччиною підписали договір в Локарно, ухвалила односторонно, што не буде вести жадних переговорів з Німеччиною так долго, покаль Німеччина не цофне своїх військ з Приренського краю.

Білград: В югославському парламенті в часі обрад стрілил до прем'єра Стоядиновича опозиційний посол Арнанович. Всі три стріли хыбили. В звязи з тым власти арестували 9-ох послов з групи Евтича.

Мілян: Дня 8. марта в фабриці автомобілей Изотто Фрашини, котра робит тепер для воєнної оборони Італії розорвало котел. 10 робітників убито на місці а 14-ох єст тяжко ранених. Фабрика севсем розвал. на.

Париж: В звязи з напруженим положенням в Європі, во Франції не дають нікому військових урялів.

Берлін: С Приренського краю доносять, же дня 8. марта рано перекрочили границю демілітаризованої стріфи відділи німецьких військ і обсадили гарнізони в Кобленці, Франкфурті н/М. Могунці і Колонії. Войска были витані оваційно через толпи місцевого населеня.

С Лондона доносять, же в Приренському краю находить ся 19 батальйонів піхоти і 13 відділів артилерії: Войска летничі і відділи противлетничі суг стационавані в Колонії. Число тых військ выносіть 25

тысяч вояків і численну артилерію і аероплани.

Париж: Французські військові відділи обсаджують військові фортифікації і місця межде фортифікаціями.

Париж: Міністер заграничних діл Флянден отбыл конференцію з амбасадором Р. П. Хлаповським. Потведжат ся, же варшавське правительство хоче здержати прийняти на себе в виду Франції обов'язаня.

Аддис-Абеба: Італійські аероплани уж третій раз збомбардували польовий шпиталь Червоного Хреста. При бомбардуваню 3 італійські самолети упали на землю. Летчики понесли смерть в полоні.

Лондон: Амбасадор совітський, Майський заявив в Лондоні, же Москва єст готова в кожній хвилі дати Франції помоч. Совіти не годять ся на жадні переговори з Німеччиною і будут голосувати против прийнятя Германи до Лиги Народів.



## Вісти с краю.

Варшава: Міністер Внутренніх Діл приготувлять проєкт закону о основах адміністраційного поділу Державы. Закон предвиджує два роди адміністраційних одиниць: земську і городську. До повітів городських будут зачислені міста, котрі числять понад 5.000 жителів, а также такі менши, котрі мають спеціальне господарче знанє.

Варшава: Сеймова комісія ухвалила знести ритуальний убій. Против внесеню голосувало трох послов, оден жид і двоє українців.

В Лоди выбух штрайк, котрий обняв праві цілий промисл ткацький. Станули всі фабрики в числі 722. Число штрайкуючих робітників выносіть 125.000 людей. Перебіг штрайку спокійний.

Великодні фєрії в школах будут в том року скорочені і будут тревати всего лем

оден тыждень. Фєрії начнут ся дня 8. квітня (Страшна Серєда) і окончат ся дня 14. квітня вклюдно.

Варшава: В політичній подорожі прем'єра Косціалковського до Будапешта прийме участь міністер просвіщеня пр. Свєнтославський.

Варшава: 3500 студентів і студенток забарикадувало ся в Варшавській Політехніці на знак протеста против занадто высокым оплатам в університетських школах. От 10. марта студенти, не маючи провіантов, сідили без корма 1½ доби. Цілий терен Політехніки окружила поліція. Університетські школи в Варшаві суг тепер затворені.

Варшава: Віцеміністер Віроісповіданя св'ящ. Жонголович подал ся до дымисії в звязи з дискусієм в Сеймі о ритуальній убій.

Варшава: Незвычайну демонстрацію приготувлять Союз властителей самоходных дорожок. Дня 23. марта всі самоходи і механічні поїзды выйдут на місто с ліхтарнями окруженіма чорном крепом. Кожный автомобиль буде обліплений плякатами о содержаню накликуючом до знесеня податка на дороговий фонд і понижєня ціны бензыны. Пак отбуде ся демонстраційний поход самоходів, або т. зв. похорон польського автомобілізма.

В понєділок дня 23. марта т. р. начне ся в Крыниці-селі

**Огородничо-садовничий курс,** на котром молодеж от 13 до 18 літ буде могла научити ся практично плєкати ярины і овочєвы дерева.

Оплата за науку 2 зл.

Бідні могут быти от оплати освободжені.

Потребне свідочтво с оконченя народной школы.

На курсах обовязує школьчий рыгор.

В неділю дня 22. марта 1936 р. о год. 2гой отбуде ся в Милику

**Обще Собранє**

ЧЛЕНОВ ЧИТ. ИМ. М. КАЧКОВСКОГО, на котре всіх рускых людей с околицы запрашат Виділ

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся

в асекураційном Товаристві

**Вита и Краковске**  
во ЛЬВОВІ

Асекурацію приймають на цілої Лемковщині  
представителі: гг. Осиф Яновицький — Крыница-Село і  
Михаил Перелом — Сянок.